


雲谷年譜外附兩種

13584.02
887



序

余老矣自惟無所樹立忽忽鬚髻俱白獨觀書如雪性命以之豈於文字有夙緣耶追念髫齡失怙零丁之狀凄然欲絕顧慈闈朝夕訓誨依依如在目前及長得弟兄師友之助有不可誣者歷遊四方動定自檢不敢跬步踰越今幸以餘年偃息林下兢兢自惕庶幾其有終乎夫爲一事而一生之精力注之此余之所可必者也閱一生而精力有間與無間此余之所不可必者也根器有淺深成就有大小各任其天而人事寓焉甘苦得失由今思之益皇然懼矣兒輩晚出論交之暇間問往事因作譜示之異日卽以質當世諸君子廣漢

45929

雲谷年譜

雲谷老人記時

嘉慶八年春三月八日

雲谷年譜

乾隆二年丁巳三月初八日予生於漢州后營

按張氏先世本江西太和縣人世居縣之鴛溪口元末遷湖廣麻城縣明初千戶指揮伏三公隨湯東旣定蜀留兵分鎮遂家於重慶之榮昌縣後分榮昌縣地置隆昌縣遂為隆昌人今七里場有張伏三廟獻賊之亂避居遵義本朝定鼎回隆昌會歲旱曾祖連義公携子五人遷漢州后營祖冠玉公行五州貢生四子考凌霄公行二州廩生妣程孺人歲貢程公珮女雍正九年壬子兄如南諱仁壽生十一年甲寅胞姊生予生時先君夢遊瑩華山忽白猿



飛肩上化爲童子顧而笑曰予瑩華山侍者也寤遂誕予
因命乳名華長名曰邦伸字石臣號雲谷

三年戊午二歲八月初一日先君卒

是年先君考優等食廩餼時伯父超暨伯母羅孺人相繼
病歿冠玉公復病先君侍藥餌積勞成疾竟不起年二十
四歲母時擬以身殉水漿不入口者屢日先外祖父母至
勉以事親撫孤大義始啜粥守節

四年己未三歲

是年將祖業析爲四分各得田三十畝伯父母歿後遺一
姊及兄荆山玉林藍圍母程孺人撫如已子與伸等共寢

處相依爲命授室後始各居

五年庚申四歲

六年辛酉五歲

七年壬戌六歲

八年癸亥七歲

九年甲子八歲

是年伸從叔父景泗公入鄉塾三月先祖冠玉公捐館舍
卜地邑之東山裴家溝

十年乙丑九歲

是年景泗公遷居桐子樹離舍東里許仍從叔父讀書

三
十一 年 丙寅 十歲

十二 年 丁卯 十一歲

是歲授經學艱於買書以紙抄讀

十三 年 戊辰 十二歲

開講作時文景泗公初以事父母能竭其力命題余破云
竭力以事親孝已克盡矣叔父疑有倩者呼至座歷試之
俱明順

十四 年 己巳 十三歲

應漢州童子試不利

十五 年 庚午 十四歲

十六 年 辛未 十五歲

十七 年 壬申 十六歲

景泗公因家貧買遷余拮据構茅舍數椽於舍南延表兄
程師中先生若楷爲師會課余常居首是歲應州試第三
府試第四

十八 年 癸酉 十七歲

是歲入泮鄉試卷落井研白士宏先生房薦而不售時湖
北進士羅朴齋先生克昌蒞州任觀風拔超等第二并取
平日誦習文校之

十九 年 甲戌 十八歲

時大竹周玉潭先生國器經術湛深設教新都雙牛寺因
往受業凡三年是歲大兄如南入中江學

二十年乙亥十九歲

是歲學使王容齋先生晟釐正文體歲試漢州一等僅一
人余列二等第一補增九月徐孺人來歸

二十一年丙子二十歲

科試一等第一食廩餼容齋先生獎慰甚至鄉試卷落青
神林賓九先生鴻房薦而不售十月考入錦江書院時掌
院為高白雲先生辰金堂人辛未進士由庶常改歸班假
歸宿儒也課文屢第一

二十二年丁丑二十一歲

肄業錦江書院時學使史怵堂先生貽謨觀風超等第四
歲試一等第一

二十三年戊寅二十二歲

肄業錦江書院驛鹽道卜觀察寧一考課五置第一

二十四年己卯二十三歲

科試一等第一怵堂先生甚贊賞擬舉余優生八月鄉試
八闈首題詩三百一言以蔽之次題及其知之一也三題
今人仁見孺子將入於井皆有怵惕惻隱之心詩題玉韞
山含輝榜發中式是科大主考為刑部郎中閔峙庭先生

鶚元浙江歸安人乙丑進士後官江蘇巡撫副主考爲編修周立崖先生於禮雲南督義人辛未進士後官大理寺少卿房考爲林賓九先生卽丙子科薦卷房師也先是卷未出房立崖先生搜遺卷得之填榜時賓九先生愕然卜觀察素知余爲監臨監試諸公言之喜甚閱日白雲師宴兩主考於城南少陵草堂命同年何希顏明禮李兩村調元張鶴林習姜爾常錫嘏與余同八宴諸公有詩屬余五人和焉蓋是科初改表判爲試帖以五人詩入選故有是命立崖先生詢知家寒促同行因事不果回家拜母始措貸北上是歲長女生

二十五年庚辰二十四歲

抵京立崖先生招至館與族兄鶴林同寓因從先生授書法會試卷落朱倩圃先生房薦而不售李石亭先生化楠接至滄州署與同年兩村同讀書九月患唾血

二十六年辛巳二十五歲

二月至京雲南張醫語以服側栢葉法病稍愈會試卷落秦西巖先生賢房薦而不售回蜀

二十七年壬午二十六歲

設館於舍南碧露草堂生徒八十餘人因病戒酒及鹽茶每日淡食是歲二女生

二十八年癸未二十七歲

是歲值會試因母多病未赴京仍就館課徒大兄如南歲
試一等第一

二十九年甲申二十八歲

館碧露草堂因從遊者衆訓迪過勞患怔忡

三十年乙酉二十九歲

余因病與生徒約只四十人冬月北上

三十一年丙戌三十歲

抵京入闈後大挑一等揭曉被放擬呈請註銷一等再作
會試計立崖先生曰知縣雖微却有實惠及民正學者體

驗經濟處且君恩也况汝家貧母老需祿養舍已成之

功名而欲求未來之科第不亦誤乎因遵例於五月初二

日赴吏部帶領引見先是乙酉秋夢登白玉梯見棟宇

巍峩金碧燦爛旁一人曰此碧雲天也汝不欲留此從此

下入一洞中迤逦而出遂寤私擬是科必中被放以爲夢

幻及入大內由乾清門左登階階白石入乾清宮殿

闕相望一一如夢中所見因悟數有前定也旋籤掣河南

抵省與同年樂山羅飛鸞輔同寓檢閱律例及各成案時

有道人求見年約四十許自言爲合州鎮遠將軍李芳述

之弟芳述國初人計之殆百餘歲矣謂余有夙根宜服丹

並述招隱意余辭道人曰君他日亦急流勇退人也遂去
後丙申年如兩兄於京都見之應 詔禱雨立應 賜號
桂栢老人亦奇人也八月周愚溪先生於智調補開封府
立崖先生胞兄也延余入署代辦發審案件

三十二年丁亥三十一歲

八月委署輝縣篆問吏治於愚溪先生先生曰州縣用度
繁惟儉可以養廉而公帑尤宜慎重弊去其太甚餘惟從
容久自就緒延名幕王翼庭往值取漕平斛响擋民甚踴
躍甫一月交兌民間詞訟惟期質天地順民心而已

三十三年戊子三十二歲

正月卸事回省遣人迎養老母時撫憲阿公思哈以分發
人員較多議以科分先後分題補借補兩班輪用余借補
光州州判母程太孺人携徐孺人及兩女來署是歲光州
及所屬光固息商四縣灾余分查東北鄉按戶口人數生
理何爲極貧何爲次貧何爲不應賑或直入其家向童穉
查問間有踰堡求賑者立指里居姓氏示之皆帖服然查
核雖嚴收入極次貧者較寬竟事無一人訛議是歲納筮

室王氏

三十四年巳丑三十三歲

光州州判駐劄息縣烏龍集離光州息縣各一百二十里

與安徽接壤俗兇悍羣盜出沒共轄十二集鎮缺雖閑曹
事匹劇縣余蒞任年餘甚安靜州牧果亭高公光煌相待
甚優時調至州審案總記一年共辦三千八百餘案從無
翻控者光州多上控之案至是始息九月委署正陽縣篆
前任抱病久積案繁多到任後每日約以十五案爲率一
月後塵案俱清呈詞不實者卽面訊勸息應理之案卽傳
審任人環集不呵斥一切陋規俱革除是歲三女生

三十五年庚寅三十四歲

正月交卸回光是歲借帑修理烏龍集衙署並代纂光郡
通志六十八卷光郡初無志余廣加採訪潛德幽貞多所

表揚云是歲四女生

三十六年辛卯三十五歲

三月天氣亢旱蝗蝻大作民初隱匿不報後遂蔓延余時
在光帶領夫役擇寬平地而剗長溝溝外牽布城城外數
百人持拍笆排打蝗奔騰如潮湧入溝溝中有窠窠滑不
得上岸外數百人以杵舂之甲處淨盡再撲乙處亦如前
法所持拍笆以破鞋底繫木柄上夜間燃火數十處蝗見
火卽自撲並設局捐貲購買以沸水澆之烏龍集界連阜
陽爲蝗孽萌生之處隨赴彼協辦四月蝻亦息時藩憲何
公燭在鹿邑督辦蝗蝻飭屬甚嚴隨將前情具稟蒙批此

雲谷全譜
次捕蝗出力以該員爲第一深堪嘉尚着紀大功七次以示鼓勵又奉南汝光道高公趨調赴三河尖協捕並由春河至商城之金剛臺跑剉蝗予以絕根株七月初二日委署確山縣九月回任時先慈住光久思歸因同族妹由水路回川初麻城族兄雲以庚午舉人任閩南司馬告歸路經烏龍集貧不能行遂留止署中薦光州書院主講子女不能嫁娶者余爲摒擋之有妹適查氏婿遊幕入川是年因與先慈同舟云十月永撫軍德題補襄城縣知縣十五日到任時長隨薦者六十餘人余簽掣十人量才安置餘悉引去襄城爲兩湖雲貴通衢差使絡繹拉車拉馬商民

頗病余均設法查明縣中騾馬車輛挨次輪換增減以時添註署內外各置一簿計十三月始輪一次官民便之至今垂爲令甲同鄉公車過境差人照應酌送酒席程儀并得訪問鄉里情事是歲恭遇 覃恩馳贈祖奇瑞爲文林郎祖妣趙氏孺人 勅贈父越爲文林郎 勅封母程氏孺人時漢州紳耆以先慈節孝聞於當事題請 旌表奉旨允准給帑建坊十二月夜三里塲火余亟出城城已局扭鎖赴火次風猛火烈哭聲酸鼻救之不得余私念辜實不德願灾宰身民若無良願許修省以懺重孽拜禱須臾風從東南缺處去火漸息是歲長子玉麟生

三十七年壬辰三十六歲

二月先慈來署次子襄麟生月餘病驚風不育五月玉麟病泄亦殤秋收開征常平義倉向例每石息一斗經手者暗加一斗以脩鼠耗糜爛兼零尖踢斛計每石得三四斗余定每石息一斗禁零踢各戶完納後多將餘穀傾入倉怪問之僉曰昔年多數倍不足今年少數倍反有餘民之受惠多矣是瑣瑣者尚忍携回耶每年傾入倉者二千餘石勸阻不能禁時有樵夫二送柴兩擔不受值而去追之不及十月奉檄修各營房余勘造如式襄多古蹟如穎橋爲穎考叔故里橋南有穎谷封人祠龍門爲漢司隸李膺

故里縣南爲古汝水發源天息山過襄城鄆城湛汝諸水自南來入之又南爲首山黃帝訪道處又南爲馬跑泉光武駐軍處再南爲湛河窪卽水經所稱湛坂也俱建坊標題是歲選刻汜南詩鈔四卷

三十八年癸巳三十七歲

三月初五日子懷洵生徐孺人愛憐甚至余因先舉兩子皆不育有姪三人爰呼爲四兒六月徐孺人卒未卒前案頭大鏡忽中分爲二蓋咎徵云是歲囹圄空虛禁卒無事父老來觀者咸歎爲生平未見並戲云此遞解公館也冬祈雪雪盈尺

三十九年甲午三十八歲

三月初少雨仿春秋繁露念木即神咒札龍祈禱不應擇日再祈大雨霑足每畝麥收二石有奇麥穗兩岐數十處余以事涉嘉祥靳不報上憲風聞差人採取贊賞不已鄰邑時有煌災竟未入境六月沈孺人來歸孺人江南吳縣人前御史沈公景瀾孫女雲坡老人猶龍之女也是時官民相依有水乳交融氣象蓋余自服官以來民間利弊事體卹在襄三年始終尤不敢懈故士民信之最深云十一月朔忽張公炎辰奉檄署襄城事並携委牌委余署固始縣事蓋是年固始早前任某未報勘十月災民數百將

某扛至江南霍邱界棄之去及歸婦女登堂擊鼓而集俱罷四鄉民入城填街溢巷洶洶譁甚某遂以民變具報時值山東王倫之變上憲接報驚駭謂張炎辰曰襄城張令官聲甚好計此事非渠不能任汝可往代之促彼速往勿緩計襄至固邑須十日程余卽束裝六晝夜趕至途間先出示曉以大義並許散給籽種口糧人心稍定甫接印陳觀察輝祖至次日榮藩憲杜亦至榮公旋奉 旨赴遂平查辦王倫餘黨謂余曰吾將去此固始事汝能任之乎對曰事勢如此駐節久民情更不可測今以事去民無疑且旣委伸則責無旁貸此時但能給籽種使民有麥收之望

再得撫綏一二次當自定藩憲卽座間撥鄰邑庫貯五萬兩付之且曰望善撫之勿貽余西顧憂也翼日銀至余以次散給籽種口糧無一譁者先是前任某具稟奉駁趕緊補報災分不敢赴鄉徧查委之書役地保已多至五十餘萬口以需索故多遺漏余念惟煮粥方可一律收養遂於縣北關帝廟設廠收養男口奶媠廟收養女口北鄉劉家大廟男女兼收共一萬六千名有奇其時女口多生育有一日產五男子者余賃廡居之每日送粥全活甚衆並開倉搗米以供煮粥共捐谷六千餘石蓋旣已奏請放賑具稟恐致駁詰反於賑務有碍寧先撥用事後籌補雖被

嚴議不卹也由是縣民間之多樂輸者復得米三百石向來粥廠之弊往往書役竊米而以石灰投之使稠故食者多斃余每日卯刻卽入廠徧查令司廠者同食廠粥書役無所用其弊故是年雖大荒無一死者至春間麥豆盈野民得聊生矣

四十年乙未三十九歲

固始在豫東南隅界連安徽湖北文風甲他邑人亦健訟初到任時上控未結三百五十餘案余日判二十五案年餘俱詳結後謁陳撫軍輝祖問曰余曾任開歸道固始控案甚多自君抵任此風頓息何也余對曰不過准情酌理

立案以垂永久耳撫軍深以為然嘆曰非深服其心者不能也邑有臨淮書院余延深陽孝廉史堂為之師按月考課定甲乙暇日至院中講書指示聲病一時人士最盛如祝曾許鑾許克岐曾光徽丁樹本許登陴沈樹綱等皆先後取科甲躋貴顯童二樹珏贈余甘棠篇二樹山陰布衣名宿也二月大兄如南授例授廣西布政司經歷回固三月赴廣西任四月五兒懷漣生十二月恭值 計典列入卓薦

四十一年丙申四十歲

正月六女生五月以薦剡入都謁見同鄉周文恭公煌及

少廷尉劉乙齋天成侍御雷紹堂翰李藝圃漱芳孟鷺洲
邵太史周東屏與岱王士會汝嘉郎中王鎮之汝璧唐堯
春樂字員外郎李羹堂詞元李孝廉鼎元天英輩飲酒賦
詩疊相唱酬極一時文酒之樂因與李藝圃唐堯春聯姻
八月初一日赴熱河引 見奉 旨加一級回任候陞遂
買書數百種載歸是役有熱河紀行草一卷

四十二年丁酉四十一歲

縣治清河湛河曲河自前令楊濟菴先生修濬後多淤塞
因大加修葺以均水利間有以溝高水低不願使水拘執
者曲為開導條陳利弊貼於龍潭大壩並挑總溝分溝每

年於十月以後二月以前舉行旣不妨工又不缺水行之
二年溝勢日低水無不利之處亦無不均之虞爭執者頓
服至築壩夫草按畝均攤嚴杜胥吏暗折夫草之弊灌溉
田數按照現在水分其不出夫草強援遠年水分使水者
懲之其有餘水願以分溉鄰田者聽於是高下均沾宣洩
有制旱澇無虞矣秋選輯全蜀詩滙十二卷是歲七女生
四十三年戊戌四十二歲

正月接大兄如南卒於桂林之信痛哉憶兄與余少失怙
先慈以一篝燈紡績余兄弟讀書於側稍倦則嚴督之淚
涔涔下今幸成立聊慰慈闈何意中道棄捐如此蓋兄自

乙未抵桂林卽署柳州府通判事丁酉調辦科場病卒老
母痛甚聞靈柩起程卽帶胞姪懷洲懷濱回川抵里門日
兄柩亦到人以爲慈孝所感云是歲儀封所屬馬家店河
堤冲決調赴考城工次時被水飢民流離河干染疫多死
余爲施藿香正氣散六合定中丸寸金丹並刊刻各藥性
於單後隨症施治皆效每日求藥者約千人隨帶夫役在
工無一染病者六月工竣回縣榮撫憲擬陞汝州直隸州
會遷去不果秋收豐稔重修固始縣志二十六卷是歲八
女生長女歸朱氏宜賓縣訓導朱廷珠次子映暘

四十四年己亥四十三歲

二月初仍調赴考城青龍崗工次挑剗引河初分工段長七丈寬十八丈深一丈五尺按照河防一覽先取中三丈成溝使遇雨之日水有所歸再挑兩旁則按日挑剗俱係乾沙不至踐踏成泥有妨人力先挑土送至引河兩岸十丈外後漸積漸高逼近成山土有所歸每日役夫四五千

人皆按日雇覓七晝夜河成續派工段九丈亦如前法九晝夜成又代光州朱公工段七丈六晝夜成工費皆自發給陳撫憲贊賞以爲工旣敏速並肯代勞大是難事河北朱觀察岐稟留工次總查帮同相度機宜六月間老母自蜀來署兩月聞予在工次遂病余稟請歸省時河正泛漲

約寬十里有餘是日晨刻登舟舟下雙錨欲行則十人挽錨一放約行三丈又下一錨又十人挽之一放又行三丈危而復安數次漏二下始抵岸覓茅菴住宿是日飲食不能下咽次日途中俱有積水二三尺不等踣泥而行身漸病由沈邱太和歸見母悲喜交集踰月病始痊十月六兒懷渭生接川闈信知從姪懷泗以是科領鄉薦

四十五年庚子四十四歲

二月掣獲潁上盜首劉黑塔解省過司院供認確鑿撫軍得兩月不奏聞者微示風旨愚以爲緝盜安民吏分內事稍有迎合是盜不死於法而死於吏不答十月忽將劉黑

塔送至穎上並委署蘭陽縣事時河決阿廣庭相國桂駐
工次蘭陽兼衝繁疲當路者意在苦之以事也余接任兩
月鉅細就理合龍後雅撫軍過縣獎慰交至擬陞直隸鄭
州酬勞而不知余意已在告養矣是歲次女歸汪氏本邑
庠生汪朝宗三子文祿余族居廣漢百餘年宗祠未立心
甚感如爰捐廉俸千金以爲倡六房和之各集金若干擇
公直勤能者董其事於舍西北數里許買地一所爲正室
三楹置木龕其中以祀神主前廳三楹左右兩廂各七每
歲元旦清明中元冬至以時祭奠如典禮

四十六年辛丑四十五歲

二月卸蘭陽事余既陳情各憲極意挽留擬陞鄭州余辭
具文得允六月二十八日老母壽終固始官署壽七十二
歲先慈一生苦節以孝聞性尤慈惠余服官後命每歲以
穀分給親族貧乏其纖弱者代爲主張之在署猶紡績無
間衣服多補綴嘗云物力艱難不忘在莒也詎意忽至於
此痛哉痛哉七月交卸九月十二日送靈柩至漢口上船
時涪州潘克齋元會爲岐亭司馬飛檄來唁並約婚姻余
命諸子出拜克齋曰小者佳卽懷渭也因委禽焉十月余
仍赴省交代十一月始束裝由西安歸里臨行時二樹山
人爲先慈作貞孝篇并送至河干執手謂曰吾歷中州見

儒雅吏無如君者君恬澹想不作出山計望自愛以著述
爲已在異日各以所成就相聞而已相對泣下流連不忍
別余連路查訪山川形勢及古人詩咏輯雲棧紀程凡相
沿譌誤考核釐正成書八卷抵家後因草舍欹斜於中江
買新宅一區靈樞於十二月至中江

四十七年壬寅四十六歲

四月七兒懷潞生時同年孟鷺洲卽給諫讀禮家居因與
締姻妻弟沈捷三聯芳自吳來訪留主余家十一月九女
生是歲爲先慈卜地凡中江德陽綿州金堂等處踏看幾
遍於三臺縣西樂安鋪東原得地一區遂於十二月二十

六日扶柩安葬

四十八年癸卯四十七歲

春同沈捷三潘東菴元音李筠亭世保遊聖泉元武棲妙
諸勝蹟元武在中江城東其山周回三里六窟三起有龜
蛇之象故名其下有淵爲聖泉出文石卽唐王勃盧照鄰
杜工部諸公賦詩處西爲棲妙山係廣政中田真人修煉
之所近多湮沒少知者余爲作元武山考及詩數章並錄
唐宋以來詩之佳者遺寺僧命刻於壁三月送沈子捷三
北上十月服闋同人相勸入都赴補豫省寅好亦書來促
駕余力辭不赴是歲爲四兒聘王福田勇之女孟鶴端卽

為其三子元章求婚遂以第九女許字鶴端鷺洲給諫之從弟也

四十九年甲辰四十八歲

延門生馮君兆昌為塾師其子國柱亦從學時從子懷浣

懷澍及朱生映嵩映旭來從余問業與之講習討論按課

作時文或間作一藝以示取則頗得敦學相長之樂焉

五十年乙巳四十九歲

仍延馮君課讀九月三女歸於王氏乙酉孝廉甘肅寧夏

縣尹王硯田畊之長子易珍余以中江米珠薪桂遂赴漢

州稍葺舊宇冬間移眷屬仍回后營居焉

五十一年丙午五十歲

春族中諸子及王壻易珍蔣生廷煥輩來受業者二十餘

人余為按期課文定其甲乙爰取有明及國朝諸大家制

藝擇其純雅者倣巳山八集之例分為養正彙精咀華叅

變四集以為家塾課本三月母難日不敢云壽而昆季羣

從戚屬門生稱觴進祝有相別二十餘年者至是握手言

歡談心道故盤旋數日始別去

五十二年丁未五十一歲

是歲四女歸金堂陳氏壻名汝德選輯唐詩正音十卷明

七律選二卷地理正宗八卷

五十二年戊申五十二歲

先高祖母胡孺人墓葬隆昌殷家壩百三十年矣去年冬從兄藍圖官瀘州學正便道祭掃見盜葬累累詢爲豪右范氏遂呈請永寧道孫公曰秉檄縣究治縣左祖三月余同姪懷泗等往清理范氏始遷去殆七塚焉余於墓旁置地數畝并叙顛末立碣付子孫之在隆者守之先高祖珩玖公曾置有家祠祭田歷年旣久經手者多當出余因與合族議集金若干贖回並約嗣後有子孫遊泮者給銀貳拾兩中式者給銀一百兩以示鼓勵其有此次不出錢者不過歲時隨班祭奠而已經理數月事竣始回漢州九月

鄉試榜發門人段鍾孚中式時直隸通永道羅江同年李雨村調元里居過訪與漣兒締姻十一月二十五日沈孺人卒於十二月二十二日命兒輩扶襯安葬於三台縣建寧驛之北原

五十四年巳酉五十三歲

正月八子懷潼生夏李雨村同其弟墨莊太史鼎元見訪約遊峩眉山余以暑不果行雨村作述懷詩三首余與墨莊及姪懷泗和之並乞雨村爲先慈程孺人作傳盤桓數日詩酒唱酬頗得林泉之樂有西園倡和集一卷

五十五年庚戌五十四歲

延鄒孝廉鑑亭大訓爲塾師七月訪雨村於南村不遇宿
羽雲亭留詩壁間遂至安縣訪張明府仲芳及山長顧德
草稷德草工書法曾著副墨近品論近代書家優劣八月
十三日恭值

純皇帝八旬萬壽赴成都慶典局隨班拜祝時內江同年儀
部姜爾常錫嘏掌教錦江書院以其第七女與八兒締姻
十二月四兒懷洵完娶

五十六年辛亥五十五歲

仍延鄒鑑亭課讀二月中旬劉生自德陽來言張氏園林
之盛余以詩柬雨村同遊二十六日九子懷淇生九月大

庾戴可亭先生均元科試編屬洵兒以德陽籍游泮是歲
南籠守唐堯春樂宇扶母櫬至夔州卒於舟次其四子張
蘭余第六壻也抵綿竹後卽送來讀書

五十七年壬子五十六歲

二月舒甥禮堂文彬訪余於后營蓋余一姊歸金堂舒氏
生一甥卽禮堂也姊夫早卒姊茹荼矢節撫子成立於丙
申年爲甥援例分發湖北鍾祥縣麗陽司巡檢姊亦就養
在署是年甥奉委解餉回蜀因給假省墓蓋相別十餘年
矣依依語舊得姊氏近狀甚悉遠懷爲之一慰時鄉里學
校中亦以姊氏節孝聞於當事題請旌表奉旨允准

給帑建坊與先慈後先輝映焉三月爲滙兒完婚

五十八年癸丑五十七歲

正月延童時熙佩章課讀三月長孫懋中生舍南有橋跨
清泉溪爲州東各集鎮往來之要道從前架木爲橋冠玉
公易之以石經今五十餘年日漸坍塌余與友叔玉林二
兄謀議改捲洞堅實可久爰集金百餘鳩工督造閱兩月
而橋成爲易名青雲於橋側立字庫一座並爲作碑記以
誌顛末四月四媳王氏卒五月滙兒受知於督學使者吳
壽庭先生樹萱游泮九月唐壻來就婚初漢州學宮前泮
池寬十餘畝元明以來時有金鱗游泳士子每於此決科

爲州勝蹟明季兵燹後廢爲荒圃余請於州牧胡一峯先
生延璠率同人重爲修鑿凡四閱月始克復舊觀時大成
殿漸傾圯舊有鐵鑄聖像但儒衣儒冠頗失尊崇之意且
於典禮不合因爲添設冕旒並整修大殿及兩廡更捐金
補築周圍墻宇而聖廟於是燦然可觀矣

五十九年甲寅五十八歲

九月秋闈榜發懷滙中本省鄉試是科正主考爲郎中范
攝山先生鑿大興人副主考爲中允余秋室先生集錢唐
人本房高縣庚子科進士周莘圃先生謙仁和人十一月
滙兒偕門生段鍾孚及冉孝廉轍北上

六十年乙卯五十九歲

二月至綿竹訪唐壻並爲其尊人堯春謀葬地途中忽病眩暈急歸調治稍愈自是時發時止年餘方就痊可四月爲洵兒續娶李氏成都前山西汾州司馬李公珠庭元芝次女八月送兒輩赴省鄉試姜爾常邀同李雨村遊浣花溪置酒少陵草堂回憶己卯榜後陪宴迄今三十餘年何希顏家鶴林已作古人而余三人尙得携酒論文重尋舊約爲之黯然壁間觀中州李鶴林振青畫蘭雨村題五言律詩二首余和之翌日鶴林復邀同往極一時文酒之樂是歲十一女生選刻排律韻薈四卷

嘉慶元年丙辰六十歲

三月學使李滄雲先生彙歲試渭兒及唐壻俱入泮朔八日值母難辰賓朋稱祝畧如五十歲時然歲月如流忽周甲子恐德業無成多年多辱惟兢兢自守而已十月次孫懋祿生

二年丁巳六十一歲

春胸膈間忽患瘍症日漸甚幸飲食如常不致爲累多方調治數月始愈自是精神較昔稍減矣十一月渭兒往涪州潘氏就婚

三年戊午六十二歲

正月渭兒自涪州挈眷回里四月初八日十二女生六月懷淇患痢疾數日而殤此子頗聰慧四歲能辨四聲以爲或易成就遽爾夭折殊爲慟惜懷洵科試優等食廩餼旋考取優貢第一是歲納妾龍氏

四年己未六十三歲

春聞

高宗純皇帝升遐六十餘年深仁厚澤普天漸被哀詔到日旄倪哭泣如喪父母時達州民王三槐等倡亂餘黨蔓延秦楚蜀之間四月從姪臨川懷泗自軍營歸里予得信喜甚遂肩輿趕赴德陽墓次相見泣下蓋姪自己酉歲赴都

以四庫館議叙選授懷來令繼調宛平旋以疎防被議留緝會達州教匪滋事遂隨陝西永撫軍保至漢中因乞假省墓予賦詩四章寄之翌日族中諸子往訪於半畝園遂以韋應物詩寧知風雨夜復此對床眠始話南池飲更詠西樓篇分韻賦詩彙爲一集各水村唱和集景泗公爲之序時年八十有三亦韻事也六月督學使者陳鍾溪先生希曾歲試漢州渭兒考列一等第一食廩餼八月十兒懷沂生九月命潞兒赴都就孟氏婚與臨川姪同行十月第三孫懋炎生

五年庚申六十四歲

正月十六日達州賊黨偷渡嘉陵江余避居省垣於北門內買宅一區挈眷居住八月添第四孫懋嘉及長孫女九女歸於孟氏是歲渭兒以優等選拔從姪懷澍馮生國柱亦與焉錦里新編十六卷成

六年辛酉六十五歲

正月第五孫懋豫生九月榜發洵渭兩兒俱中本省鄉試是科正主考爲侍御錢次軒先生斌仁和人戊戌進士副主考爲戶部主事楊剛亭先生健清泉人丙辰進士洵本房爲蓬溪邑西進士敬約堂先生大科和州人渭本房爲青神甲午孝廉朱筓村先生懷班桂林人十一月兒輩由

省城東門外買舟北上

七年壬戌六十六歲

春連舉二子一名慶元一名玉山春闈揭曉兒輩俱下第於七月歸里九月資州牧趙蘆洲先生遵律來訪出所作甘露寺八觀龍洞記書後近作數十首見示九日復置酒草堂邀同內江孝廉艾春岩榮松及兒輩遊青羊浣溪諸勝登高懷古握手談心風流逸韻亦宦海中不可多觀者是時兒輩刻予詩集八卷將次告成蘆洲復爲之序以弁其端十二月潞兒同臨川姪携眷回里

八年癸亥六十七歲

課兒輩讀書鄒生嶧賢李生化同劉生倬來從學是歲添
六七八三孫余因漢州舊志簡畧太甚暇日廣爲搜羅彙
爲十二卷名曰繩鄉紀畧六閱月始告成余老矣精力就
衰不能多所撰作擬於秋後回后營清理家務交付兒輩
余得藉以息肩旋省時再將紀畧一書刪訂付梓此後靜
坐焚香閉門課子不復以俗累攪心矣

右先君自訂年譜係去春課讀之暇因不肖兄弟等晚出
不能知昔日事追憶六十餘年甘苦閱歷畧書梗概付洵
等收藏去秋回漢州經理莊務凡親友一切借貸貧不能
償者悉焚棄券契且量爲伙助盤桓數月於十一月二十
二日始回省先君體素健旺精神飲食不減壯時惟步履
稍弱然無他疾病數日前忽覺眩暈時發時止醫者謂火
氣上炎投以清火化痰之劑頗效二十五日尙與家人輩
圍爐聚話昏刻忽痰壅氣喘令人扶至牀褥閉目端坐至
戌刻鼻息漸微玉筋雙垂溘然長逝壽六十有七嗚呼痛
哉不肖等未能仰體庭訓稍自樹立熒熒在疚俛俛無之

雲谷年譜
痛念先君一生持躬莅物政事文章畧具斯譜觀者可得
其概謹付剞劂俾子孫什襲藏之他如與人以恕交友以
誠睦嫻任卹以惠以及厲俗型方培植士類其彰彰在人
耳目者未敢多贅不孝等草土餘生語無倫次惟冀
大人君子錫之銘誅傳誌以光泉壤則不孝等生生世世感
且不朽嘉慶甲子孟春不孝男懷洵等泣血謹識

張雲谷太翁傳

君諱邦伸字石臣雲谷其號也世籍江西太和明初遷蜀之
隆昌數傳至曾祖連義公遂家於漢州焉君二歲而孤程太
夫人撫之襁褓中伶仃孤苦形影相依稍長深以不及事父
凌霄公爲終天恨每側聞母訓涕泣誌之不敢忘先是君生
時父夢遊瑩華忽白猿飛肩而上化爲童子頽而笑曰予瑩華
山侍者也寤遂誕故其髻齡卽穎悟過人每讀一書如素所
成誦迨至嶄然頭角時能屬文叔景泗公屢面試之皆入彀
十七歲補博士弟子員食餼於庠遇試輒哀然居首二十二
歲舉於鄉座主爲閔峙庭周立崖兩先生時有歐陽得子瞻

之目衆謂張氏有子矣會試累舉不第患咳血猶力疾讀父遺書達旦不少輟嗣遂還家奉母息轍課徒三十歲始至京大挑一等君志不欲小就質之師師勗以及時施實惠答君恩且家貧親老正需祿養毛義捧檄而喜盖有所屈也廼隨班引 見籤掣河南遂迎養於光州署朝夕供子職迴憶熒熒予立時越今三十載菽水之志差慰矣君所蒞率極衝輝縣爲通省財賦區劣衿蠹吏時或乘隙滋事君至力治之船載塗歌民甚踴躍其治漕如此迨其補光州州判也值四縣旱東北鄉分析離居君按戶口人數分中次極貧查問得實無濫無遺其治賑如此光俗剽悍羣盜出沒君蒞任年餘

萑苻盡息此外共結三千八百餘案無上控者其除弊如此光歲偶歉多蝗蝻民隱匿不敢報君爲惻然督夫役擇地剗溝蝗奔騰如潮湧入力剗之使盡息後遂有麥穗兩岐之應其捕蝗如此又明年補襄城縣復調知固始事是歲固大災前任未及報勘四鄉民沟沟入城時遂以民變具報上游以張君官聲好促往代之君爲曉諭大義給仔種口糧人心稍定又請撥隣邑庫貯銀五萬兩付之且更自捐穀六千餘石設粥廠所全活者萬六千名有奇其濟衆如此於是撫臣憫其勞又以治清河水利并治潁上諸蹟欲登之薦牘君以母疾當告養力辭痛值母喪百姓咸若大戚君繫念慈親一生

苦節孝德上聞垂老猶紡績不倦衣服多補綴遺容猶在風
木淒懷蓋至是而君竟不復作出山計矣自歸田後日以著
述爲已任督課子弟或偶拈題自作一藝與受業諸生討論
之他若建宗祠修文廟交友睦族陶鎔士類惟日以行善自
娛或勸入都赴補謝不應其出處之際如此君素體健聞君
客秋回舊宅清理家務凡向時借貸力不能償者悉焚其券
并躬詣親朋家絮語如作永別狀比十一月二十二日來省
垣越三日果端坐長逝年六十有七其去來了然又如此君
之所著述者光郡通志六十八卷固始縣志二十六卷雲棧
紀程八卷錦里新編十六卷繩鄉紀畧十二卷西園唱和集

一卷熱河紀行草詩一卷雲谷詩鈔八卷雲谷文鈔四卷所
選輯者汜南詩鈔四卷唐詩正音十卷明詩七律選二卷全
蜀詩滙十二卷地理正宗八卷排律韻薈四卷維桑集四卷
子八人懷洵懷淮懷渭俱連舉賢書孫八人

論曰自古才人傑士半皆託迹神佛仙怪以輪迴旋轉於天
壤間謝靈運前生慧業李青蓮夙世如來尙已其人或技藝
卓冠一時或文章宣昭人口英風灑氣誠足凌鑠百代然遭
遇非時不獲盡展其所抱負故晚年著述每多悲歌慷慨以
自抒其不平之鳴惟君躬逢 盛世在鄉爲名諸生在官爲
世循吏詩歌雍容道揚懿美所至多惠政宏濟時艱而尤可

傳誦者莫大於能事母君自少至壯至老中間得祿養數十年未嘗一日忍離膝下迨母歿之後遂終其身守墓廬不復榮情膺仕是則至性過人始終如一今其流風餘韻猶能令子若孫恪奉先訓敦孝友以上繼家聲固非凡爲良有司所能企及者蘇子瞻云其生有自來其死有所爲是固信之於理而益知君實有不朽者在矣

賜進士出身

欽命提督四川學政掌河南道監察御史

四川正考官江西副考官前翰林院編修咸安宮總裁通家愚弟錢棫拜撰

皇清誥授文林郎知河南固始縣事雲谷張公墓誌銘

張雲谷先生諱邦伸字石臣漢州之后營人故籍楚麻城明初遷蜀之榮昌國初曾祖連義公始徙漢居之祖冠玉公諱奇瑞州貢生父凌霄公諱越州稟生俱以公貴封文林郎贈如其官兄諱仁壽字如南廣西布政使司經歷公其次也凌霄公嘗夢遊瑩華山有白猿躍肩上化爲童子曰予瑩華侍者奉命爲君子已而公生越一載凌霄公卒母程孺人茹荼而撫之曰務以文學世其家公年十八補博士弟子員二十四舉於鄉屢上春官不第乾隆丙戌聖天子方雅意作人舉大挑

盛典俾寒峻得及時自効公與挑得高等以知縣用籤掣河南借補光州判官判署分駐息縣之烏龍集壤接安徽羣盜往往出沒其間公捕渠魁治以法羣盜斂迹去辛卯光州蝗起公奉文捕之令人掘渠數丈以布蔽其一畝如城數百人持拍笆逐至蝗爲布所阻輒墮渠杵令死夜則燃火其處誘蝗撲火光迫之亦墮渠死仍懸價購餘蝗之不及逐者一二日間蝗絕蛹竟不起是歲也蝗而不害布政使何公聞之曰此出力捕蝗第一員也明年補襄城縣知縣縣爲通衢使者車馬絡繹於道民病役不均公籍有車馬者爲輪法均其役凡十三月而役一周其車馬有登下者以時增減各如簿官

民至今便之縣有常平義倉每歲春發秋歛歛加息一斗而倉役恣爲奸假鼠耗倍其息零尖踢斛又倍之公僅取息一斗餘盡捐之而嚴禁倉役之作弊者民戶入穀往往獲羨餘而歸乃相率以其餘者傾入倉公怪問之曰往者倍數而來穀不足今如數而來尙有餘民受其賜多矣顧惜此芟芟也襄城名勝之區向多古蹟如穎橋者鄭穎考叔故里龍門者漢司空李膺故里首山者黃帝訪道處馬跑泉者漢光武駐軍處汝水湛坂皆水經所載各爲坊聯以表之政理民和案牘清簡明年送無繫獄者囹圄虛無人獨遞解流囚宿焉父老來觀指爲解囚傳舍也甲午固始災饑民欲爲變大憲調

知固始縣事公下車先曉以大義使各定厥居然後請帑銀五萬兩按極貧次貧例分別給口糧籽種計賑五十餘萬口其漏冊者又萬六千餘人爰設粥廠男女異所俾學官司之公日巡其處至則嘗粥而後分給使書役不敢竊米襍灰滋弊時孕婦多產育有日產五男子者別賃廡居之厚其養使不及於病凡捐倉穀六千餘石而全活衆矣縣有報殺其女者民自外歸門閉不啟掇入之女縛柱而綿塞其口以死無姦亦無失物公驗之併驗得後墻足跡密令民確檢所失而密以告果失錢四千文口袋一條問有見此錢者乎曰表兄某曾見之且向借未與因飭民自邀其戚族隣人集庭下有

不至者以賊論已而畢至某亦至公點名逐一目之目至某色動點畢拍案大叫曰得賊矣某益色驚遽詰之吐實問錢袋安在曰棄之池渴而取之真贓也一時服其神明計與卓薦入 覲歸仍知固始縣事縣有清河曲河堪河引灌圩田爲一邑之水利歷年溝淤益積而高水益退而下水有及溝不及溝而訟興焉公喻民按畝均夫按籍徵草歲一挑濬每於十月以後二月以前舉行逾年溝低水高溝以次受水水以次入田無病旱者考城黃河決大憲檄公往治之河濶十丈有奇徃者夫役足陷泥淖中施畚鍤不便公令先濬河心濶三丈許使水趨中流兩旁淤泥漸涸爲浮沙而從事焉

事半功倍矣負土兩岸約一丈以外積如邱阜因以固隄防計自青龍岡以下長二十餘丈兩旬而畢功大憲嘉其成功之速將陞汝州或鄭州議未定適公以母程孺人病請告終養而程孺人壽終固始官署矣扶柩西歸年四十五歲正古人強仕時也服闋後遂棲隱不出初合州有李道人者國初鎮遠將軍李芳述之弟也計年百餘歲矣乾隆丙戌公遇之於汴城謂君有夙根將授金丹公以祿養辭道人曰他日急流勇退人也至是果如所言公家富圖籍杜門快讀異書尚如諸生時訓課諸子得登賢書者三人公修宗祠賑族黨賜鰥寡孤獨之無告者同年友某宦江寧以事繫刑部獄公爲

歸其孳於蜀業師高白雲辰卒後遺妻晉氏老而貧甚公膳養至二十餘年無倦色其勇於好誼如此公好爲詩歌約四千餘篇手自刪滅僅存集八卷行於世其他著述有光郡通志六十八卷汜南詩鈔四卷熱河紀行草一卷全蜀詩滙十二卷固始縣志二十六卷雲棧紀程八卷唐詩正音十卷明七律選二卷地理正宗八卷排律韻薈四卷繩鄉紀畧十二卷錦里新編十六卷維桑集雲谷文鈔若干卷慶誕記一卷嘉慶癸亥十一月二十五日方宴客談笑飲食如常是夜無疾而卒距生乾隆丁巳三月初八日得壽六十有七歲配徐孺人繼娶沈孺人俱先公卒子八人長懷洵辛酉舉人次懷

澁甲寅舉人次懷渭辛酉舉人次懷潞次懷潼次懷沂俱業
儒次懷澂次懷澧俱幼女十二人長適宜賓縣訓導朱廷珠
之子映暘次適邑庠生汪朝宗之子女祿三適寧夏知縣王
畊之長子易珍四適陳惟觀之子汝德五適六適南籠太守
唐樂宇之子張蘭九適廣東順德紫泥司巡檢孟印之子元
章餘未字孫八人懋中懋祿懋炎懋嘉懋豫懋直懋科懋卿
俱幼嘉慶庚申公由漢州避賊亂遷居成都余亦病休寓省
居相近志相得也暇日讀公所著書併識其居官廉明狀甲
子初秋歸窆有日矣孝廉君懷洵等奉公年譜來乞余誌因
按譜撮其政治之大者叙次如右而系之銘銘曰

於惟雲谷古之人與服官不十五稔而水旱與俱民各寧其
居林下二十餘載而遺榮甘蔬樂我琴書在國爲循吏在鄉
爲鴻儒詩書貽後慶也有餘城開滕沈墓樹枌榆琢石紀之
惟懷永圖

嘉慶九年歲次甲子秋七月知順慶府南充縣事京山愚弟
李元頓首拜撰

公諱... 字... 號... 雲谷... 公卒於蓉城...
 第感族聞之哭於巷士大夫聞之相與嘆息於官僉曰善人
 已矣泗聞信奔至哭於柩之前和諸昆相抱泣嗚呼斯文墜
 矣小子安仰甲子冬卜兆既定洵等囑泗為公狀嗚呼小子
 忍狀吾叔哉公生平出處俱在年譜已乞當代大君子為傳
 為墓表為墓誌銘不復狀今就其大者而繁其詞并狀公逸
 事公諱邦伸姓張氏字石臣號雲谷別號瑩華山人曾祖連
 義公由隆昌徙新都旋徙漢州祖冠玉公州歲貢生父凌霄
 公州廩生俱以公貴贈如官母程太孺人奉 旨旌表節孝

先叔雲谷公行狀

嘉慶八年癸亥十一月二十五日吾叔雲谷公卒於蓉城里
 第感族聞之哭於巷士大夫聞之相與嘆息於官僉曰善人
 已矣泗聞信奔至哭於柩之前和諸昆相抱泣嗚呼斯文墜
 矣小子安仰甲子冬卜兆既定洵等囑泗為公狀嗚呼小子
 忍狀吾叔哉公生平出處俱在年譜已乞當代大君子為傳
 為墓表為墓誌銘不復狀今就其大者而繁其詞并狀公逸
 事公諱邦伸姓張氏字石臣號雲谷別號瑩華山人曾祖連
 義公由隆昌徙新都旋徙漢州祖冠玉公州歲貢生父凌霄
 公州廩生俱以公貴贈如官母程太孺人奉 旨旌表節孝

建坊里門公生二歲而孤稍長讀書不善記記輒不忘每所覽書能通曉大義程太孺人夜紡綿課公及兄仁壽讀讀稍倦太孺人日而忘爾父耶積學未遂而賫志以歿歿時以手指汝冀有成也不學何面目見泉下語畢太孺人泣公與兄俱泣以是益奮勵弟兄先後補弟子員以學行重於時公已卯舉於鄉歷官河南光州州判輝縣正陽確山襄城固始蘭陽縣知縣有惠政大計卓薦屢擬鄭州直隸汝州知州以母老乞養不拜既乞養得允旋奉諱歸里服闋不出山優游林下者二十餘年公之令襄城也緬甸之役吉林兵過境前途畏其剽悍輒封署藉事他出而以丁役應之兵見官怯勢益

張公令洞開堂門肅儀仗使知 朝廷體制而躬自照料出境凡廩餼車馬無缺亦無濫其有桀驁者與領隊官言之故吉林索倫兵以次過境無敢譁公之調固始也前令某以旱灾未報爲百姓拉至安徽霍邱縣界棄之去某踉蹌歸士女譁於堂某遂補報灾賑情形而以民變上告時值山東臨清有警當事大驚檄公馳往公兼程至縣屬之往流集集市皆罷人以布蒙首插草標折棹几脚爲其公曰爾曹何爲衆曰某等無他聞前官告變省中大人動兵某等死於歲與死於兵等耳不得不自爲計公曰休矣豈有將用兵而使新官受代者乎省憲實帶銀來賑汝等耳衆不信公曰若有他意我

豈單車疾馳而來今晚矣我爲汝等留一宿倘有變願以身代之是夜公進紳耆與之言并作諭數十通使張布各處衆素耳公名及讀諭相與流涕皆曰今始望活公至署之次日方伯榮柱開歸道陳輝祖先後馳至方伯旋奉命赴河北防邊臨行謂公曰固始事至此可奈何公曰憲節駐久民情不可測今以事去民自定此時計得銀五萬兩以次撫卹可無虞方伯倉卒出城實無銀公曰撥鄰封庫貯可速濟方伯卽座間如數與之陳觀察見民情寧貼亦旋省當前任補報災案時處處查戶口多不實公按冊給予而漏戶一萬六千有奇復據實補報其續經查出而趕報不及者設厰煮粥分

別男女以養之捐谷六千餘石或以詳請爲詞公曰事急矣倘不允事更掣肘不如先自撥碾後籌彌補雖嚴議不惜也是歲雖奇荒無以饑死者邑有臨淮書院公厚餼延名師教之暇日親至院中與諸生講示聲律尤敬禮紳士以故士民親之如父母尊之如師長依依不捨公纂輯固始志多採入古人詩詞而忌者摘以爲訾卒賴賢紳士排解而息然其書實斐然可觀是邦文獻也庚子拿獲鄰境盜首劉黑塔例得保送引見當事者遲兩月不奏間者微示風旨公不應於是將盜送還穎上而委公署蘭陽公事事就理當事復獎勵交至注意擢拔而公已決計告歸矣公少貧不能購書嘗於

荒肆買蘇詩殘本讀之紅黑圈數十遍故公詩從東坡入手
後乃泛濫百家巍然自樹一幟誅蕩排異縱橫不可一世然
皆引經據典步武一準先民遇古今陳迹尤多論斷的然爲
有關係文字而氣韻和平識者以爲生平福力之微云公精
制藝凡三變當廿餘歲時典麗喬皇爲應試之文繼乃冲和
平澹晚益高老不肯爲靡靡之音今雲谷歸田集坊間翻刻
幾遍幾於家有藏書人人手執一編凡遊其門者皆先後取
科第去公所讀書皆借鈔副本後宦遊四方藏書既多手自
披閱記者正之秘者纂之手不釋卷終日喁喁如諸生遇人
問疑難事公言在某書第幾頁檢之百不失一公與人談忠

孝輒歛歔太息聞婦女節義事涕泗交頰其艱苦者多方周
全之蓋追念太孺人守節之難推而及之孺慕之忱隨感而
發故真切如此州城地勢東南隅頗平陷公議建奎閣於城
上倡修文廟挖泮池工力捐綿倍焉是役也適山陰胡一峯
別駕權州刺史工將竣調任簡州復以書訪聖像典禮於公
公報云唐貞觀二年專祀先聖於學詔天下州縣皆立廟塑
像衣衾冕宋祥符中追謚文宣王桓圭一冕九旒服九章崇
寧中冕用十二旒明嘉靖九年改易木主以其像瘞大成殿
後此木主之始古者祭必有尸釋奠於學無尸設像以代之
變而得正自東周元聖廟已然文翁作禮殿圖繪古聖賢各

千狀
像亦仍此意明改祀木主道德之容莫由瞻仰惟其近於有
像無尸故至今守之不廢然天下郡縣學宮猶有用塑像者
想是時有不忍撤毀之心近見河南陳州府學大成殿及兩
廡皆像中江縣四配十哲亦皆像至聖像皆冕旒龍衮自唐
以來定制如此漢州學宮原無聖像前州牧徐芷塘先生見
村寺有鐵鑄聖像因移於文廟但儒衣儒冠頗失尊崇之義
或元以前所爲按之典禮未合宜加冕旒龍衮以昭德容之
盛辨極詳核士論韙之今廟聖像加冕旒如禮權州刺史魯
公華祝循吏也西藏之役訪驛站利弊於公公上言力役之
征聖王不廢 國家值軍興大事些須津貼小民具有天良

豈容推諉第責令當站州縣獨任則未免向隅撒入通省丁
糧則衆擎易舉不如按糧公攤俟差事臨境時先行借項墊
辦差竣之後按定確數帶征還款方能實用實銷不至有悞
差病民之患乾隆三十三年河南辦送滇差曾經奏准有案
似可仿照云云魯公歎服請於上格議未行公生平著述多
經濟裨益當世之務另載專稿茲擇其尤者錄一二於此公
見善如不及見不善亦惡之甚嚴然事過卽忘光風霽月人
皆諒之晚年兩頰忽生鬚體素健就床卽鼾睡鼻息如雷有
動卽警醒蓋心地坦白清寧之故教子弟不事呵斥以身示
法而循循引誘之待之以廉恥而養其性情使之饜飫而不

自知公之教也以故子弟與及門詩文皆有法度動定中規
矩望而知爲雲谷先生門下士也癸亥冬以事回漢州夜夢
大風烈烈屋後大樹忽中斷壓倒屋梁而醒翼日回成都撫
諸孫而問之曰汝等想我否洵等方訝不祥欲問之俄而痰
氣上壅端坐逝口中吐沫如絲玉筋垂焉公兄仁壽入籍中
江由廩生授廣西布政司經歷權柳州府通判先公卒姊適
舒氏旌表節孝元配徐氏繼沈氏子八人長懷洵戊午優貢
辛酉舉人次懷澗甲寅舉人次懷渭辛酉拔貢舉人次懷澗
國學生次懷潼懷沂懷激懷澧公生平坐處足未嘗蹲踞貼
身汗衣襦衣未嘗用絲綿飲食未嘗嘗指一味久而不渝亦

可覘公之所養矣論者謂公篤信謹守而文學斐然於聖門
中似子夏顧子夏春秋時人至戰國尙爲魏文侯師約百四
十餘歲而公年止此然綜公身世出處之際德福兼備亦夔
乎不可及哉迴憶泗莅宛平時五弟澗以公車來署公手書
勗曰爲官無濟於世讀書不登於朝皆爲恨事自古險夷無
常唯盡其在我從平時處立脚方有根抵余老矣汝弟兄互
相師友勉之勉之今洵澗渭相繼而起尙未可量而泗諸事
瓦裂深負期望壬戌冬挈眷歸里公猶拮据以應事事先爲
體郵可謂難矣而今已矣悲夫悲夫茲就所知及洵等所狀
連綴成篇唯其事實而言不文伏乞 仁人君子俯賜採擇

行狀

賜之銘誅感且不朽從姪懷泗
牧淚謹狀

一

